

INVITATION

AL MEMBRITÁ IN LI INTERLINGUE-UNION

In januar 2013 evenit li unesim "Litt incontra de Interlingue" inter li Interlingue-activistes Erich Werner, Donald Gasper e Thomas Schmidt. Li discussion qualmen crear un plu activ movement de Interlingue continuat depoy. On consentit que li Interlingue-Union deve esser in li centre de un tal initiative.

Desde li demission caus avansat etá del legendari equip de Alphonse Matejka quam redactor e Fred Lagnel quam administrator li Interlingue-Union ha concentrat se sur li publication de "COSMOGLOTTA – Oficial organ del Interlingue-Union" por mantener Interlingue visibil e vivent.

Interim, in li curse del annus, li Interlingue-Union ha perdit mult membres pro alt etá o morte, ma anc ganiat un númer de abbonates de COSMOGLOTTA sin membritá. In ti situation it apare nos important prender mesuras por ne finir in un sol adressarium.

Pro to, noi peti vos revalidar vor membritá o declarar vor adherentie al Interlingue-Union.

In li actual situation un obligatori financial contribution del membres ne es demandat – li custas vell mult probabilmen superar li recivages. Vu trova sur li reverse li statutes del IU. Tis-ci contene anc institutiones queles es actualmen vacant, ma hay li possibilitá refundar les, si hay suficient qualificat persones.

Li membres del Interlingue-Union va automaticmen e gratuitmen receiver li digital versiones de COSMOGLOTTA (paperal version sur demande) e del jurnal IE-Munde. Inter li membres del IU noi intense etablisser un constant communication con informationes pri activitás e projectes. Por devenir plu visibil, li lingue de Edgar de Wahl besona vor moral e si possibil activ suport.

Dunc ples plenar e inviar li includet carte de response o adressar un e-mail al administration! Vu es cordialmen invitat al membritá. Mersí por vor solidaritá e vor simpatie por li lingue de Edgar de Wahl!

INTERLINGUE-UNION

Bedřich Plavec
Redactor de COSMOGLOTTA

Erich Werner
Secretario del IU

Decembre 2014

Annexes:
Statutes; Carte de adhesion

STATUTES DEL "INTERLINGUE-UNION" (IU)

- Nómine, scope (1) Li international association INTERLINGUE-UNION es li universal organisation (neutral in politica e religion) por propagar e aplicar in scientie e practica li international auxiliari lingue INTERLINGUE (originalmen nominat OCCIDENTAL). It have su sede in li domicilie del secretario del Comité directiv (C.D.).
- Oficial lingue (2) Li oficial lingue del IU es Interlingue, basat sur li principies anunciat per su autor Edgar de Wahl, e in li forme resultant del decisiones del Academie de Interlingue.
- Revenús (3) Li IU tira su revenús ex li contributiones del membres, spontan subventiones, donationes e legates.
- Membritás (4) Membre del IU posse devenir omni fisic (individual) o juristic (colectiv) person quel aproba li scopes e li eforties del IU e obliga se pagar li membral contributiones.
- Federationes (5) Li membres posse organizar se in federation landal o interlandal quam membres colectiv. Ti federationes es autonom in li gestion del aferes, ma obliga se a pagar por chascun membre li contribution individual debit al IU e quel es fixat per li C.D.
- Votationes (6) Li membres del IU have li jure partiprender in omni votationes arangeat per li C.D., e esser electet quam funcionarios del IU.
- Comité directiv (7) Li Comité directiv (C.D.) es electet per votation inter omni membres del IU. It consiste ex un presidente, un secretario, un vice-secretario e admaxim 4 altri membres. It es li executiv organ de IU e quam tal gere omni aferes administrativ de ti-ci. Li colaboration del membres es fixat per un special regulament. Lor mandate es limitat a 4 annus e ili es reelectibil.
- Oficial organ (8) Li oficial organ del IU es COSMOGLOTTA. Li redactor e li administrator es nominat per li C.D. Lor activitá es subordinat al decisiones de ti-ci. Li du officies posse esser cumulabil. Li precie del abonnamet es fixat per li administrator in consense con li C.D. Li modalitás del interacciones financiari (payament del abonnamet a Cosmoglotta e del contributiones membral) es fixat per special regulament.
- Academie (9) Li Academie de Interlingue es li suprem instantie lingual del IU. It consiste ex un presidente, un secretario e admaxim 3 altri membres. It decide pri omni questiones relatent li fixation del lingue e su decisiones es autoritativ por omni membres del IU. Li membres del Academie es electet per votation general e li gremie es renovat per cooptation. Li redactor de Cosmoglotta es de jure membre del Academie. Li membritá in li C.D. e Academie es cumulabil.
- Dissolution (10) Li dissolution del IU es subordinat al approbation del 2/3 de su membres. Li C.D. decide pri li proprietá del IU.
- Change de scope (11) Omni decisiones, sive del C.D., sive del IU, concernent un eventual change de scope del IU deve esser considerat legalmen null.





INTERLINGUE
Lingue del paroles
international

Expeditor

INTERLINGUE-UNION
Erich Werner, secretario
Weidpark 3
6280 Hochdorf
SVISSIA

Ples afrancar

CARTE DE ADHESION AL INTERLINGUE-UNION

Registrat adresse:

[Yellow rectangular area for registration address]

Eventual corecturas del adresse:

[Yellow rectangular area with four horizontal dotted lines for address corrections]

E-mail-adresse:

Yo adhere al INTERLINGUE UNION quam activ membre, sin financial obligation.

Yo desira reciver COSMOGLOTTA sin custas

in paperal form

in electronic form al supra-indicat e-mail-adresse

Remarcas

.....

Date **Signatura**